

Expertonan ta keda dos siman Aruba:

Transportacion publico ta haya base legal

ORANJESTAD(AAN)—
Cuanto permiso di taxi a
worde otorga den curso
di añanan? Un pregunta cu
no por worde contesta. Di
un forma o otro e situa-
cion cu a worde permiti pa
desaroya su mes pa años,
awor ta haci cu ningun
hende por bisa siquiera
cuanto hende tin permiso
pa core taxi. "Mi no por
traha asina," Ministro An-
gel Bermudez a bisa DIA-
RIO. Pesey awor dos ex-

perto ta bay yuda pone un
base legal pa transporta-
cion publico, mientras cu
un maneho ta bira posible.

Durante un conversa-
cion cu DIARIO, Ministro
Angel Bermudez a splica
cu actualmente tin dos
experto na Aruba. Nan ta
analiza e situacion den
mundo di transportacion
publico, esta taxi, tour-
bus, Arucar. Nan lo mester
atende cu e diferente pro-
blemanan cu ta existi y

mira con por haci pa yega
na un maneho cu ta bay
evita fricción.

E expertonan mester
yuda yega na un maneho
apropia pa transportacion
publico, cu na promer lu-
gar ta conta cu leyman cu
ta andicua y no ta cua-
dro cu e situacion real.
Pesey nan mester yuda
prepara un legislacion
nobo pa transportacion
publico.

Ministro Bermudez a

monstra ariba e situacion cu
ta reina ariba e tereno aki
y a subraya cu e ponencia
cu ta dificil bisa cuanto
hende tin permiso pa core
cu taxi actualmente.

E gobernante a splica
cu su forma di traha ta
segun planificacion, cu no
ta posible bao circum-
stancianan actual.

Planificacion ta en-
cera cu mester yega na
normanan pa determina
cuanto taxi mester por

ehemplo. Lo por bay usa
e cantidad di cambenan
di hotel como base pa asi-
na dicidi kico mester so-
cede enfrente transporta-
cion publico.

Ariba termino corto e
expertonan mester entrega
nan recomendacionnan na
e Ministro pa asina trans-
portacion publico bay con-
ta cu un base legal y un
maneho planifica pa trans-
portacion publico bira
realidad.

Taxistanan a reuni cu Ministro Bermudez

ORANJESTAD(AAN)—
E objetivo tabata pa bini
hunto y pone otro na al-
tura di desaroyonan cu ta
tuma lugar. Pesey taxista-

nan a reuni cu Ministro
Bermudez di Transporta-
cion y varios punto impor-
tante a keda discuti.

E siman aki e Union di

Taxistanan a reuni cu
Ministro Angel Bermudez
y e ocasion a worde brinda
pa e Ministro worde poni
na altura di varios desaro-

yo cu e no tabata conoce.

Asina e taxistanan a
monstra cu nan tin colega-
nan cu no ta tene nan mes
na reglanan cu ta worde
imponi pa e Bond y a pidi
e Ministro pa pone e taxi-
stanan en cuestion na
altura cu nan mester sigui
reglanan estipula. Tam-
be tabata tin un caso di
un taxista, cu mester haya
un advertencia pa asina
evita cu e ta causa mal
reputacion pa e otro taxi-
stanan.

A sali na cla tambe, cu du-
rante celebracion di Car-
naval, un compania di
tour tabata transporta
gruponan di menos di 40

persona.

Ministro Bermudez a
atende e asunto aki y
antayera a manda un carta
pa e compania en cuestion
cu a worde monstra ariba e
hecho cu solamente por
transporta gruponan di
40 persona o mas,
mientras cu mester ta trata
di grupo, esta no por acu-
mula un grupo di persona
individual pa transporta-
cion.

A monstra e compania
cu e mester tene su mes na
regla.

E reunion entre e Mini-
stro y e taxistanan a bay
bon y a duna ocasion pa
intercambio opinion y in-
formacion.

Obispo Luna cu charla na Aruba

ORANJESTAD(AAN)—
Dialuna 7 di Maart ta
yega Aruba e Presidente
di e Apostolado Mundial
di Fatima Blue Army,
Obispo Luna.

Segun e programa cu
a worde prepara, dianan
8 y 9 di Maart, lo tin
charlanan cu ta pa splica
e contenido di e ultimo
encyclica di Papa Juan
Pablo II, Mater Redemp-
toris, esta Mama di
Salvador.

Lo tin dos oportuni-
dad pa dia pa sigui e
charla, esta di 9-12 di
mainta y 7 or pa 10 or
di anochi. Cada sesion di
charla lo cera cu un Santo
Sacrificio di Misa, cu lo ta
pa 11 or di mainta y 9 or
di anochi.

E charlanan ta worde
dicta na Centro di Blue
Army na Torenstraat 1,
San Nicolas, caminda dia
10 di Maart lo tuma lugar
e consagracion Solem.

Promer cu Misa, pa
7 or ta cuminsa cu un
procesion di bela den cura
di Misa.

Ta pidi tur deboto pa
participa na e eventonan
cu ta forma un bunita
ejercicio den Aña di
Maria y tambe un bon
preparacion pa Pasco di
Resurreccion.

Un kilo di cocaina confisca


Bendedor di numbertan deteni

ORANJESTAD (AAN)—
Dos dia pasa recherche
cu ta combati droga aki
na Aruba, S.V.M. a confis-
ca un kilo di cocaina.

Relaciona cu e kilo aki,
recherche a detene un co-
nocido bendedor di num-
ber di inicial T. como sos-
pechoso di tin hopi di ha-
ber cu e droga aki.

E detencion tin di haber
cu un caso di algun siman
pasa unda un paar di per-
sona a ser deteni cu cier-
ta cantidad di droga.

No tabata posible pa ha-
ya mas datos debi cu e de-
partamento aki ta traha
masha keto y nan no
ta laga informacion sali
asina facil.



E edificio aki ta di warda di Polis. Lo ta bunita si por laga pone su nomber ariba dje. Pa hopi hende e edificio aki ta desconoci y pa turista mucho mas. E reclamo aki a drenta na Redaccion di DIARIO pa pidi Gobierno pone maske ta e nomber "Polis".